



**SIPA** Provedena akcija na području Zvornika, Ugljevika i Bijeljine

# Uhapšeno 10 osoba za zločine u Zvorniku

Uhapšeni se sumnjiče da su 14. jula 1992. godine u rejonu sela Lokanj, na području Zvornika, zarobili, a potom ubili 67 Bošnjaka

Pripadnici Državne agencije za istrage i zaštitu (SIPA) jučer su na području Zvornika, Bijeljine i Ugljevika po nalogu Tužilaštva BiH slobode lišili deset osoba osumnjičenih za ratne zločine počinjene 1992. godine nad žrtvama bošnjačke nacionalnosti u zvorničkoj općini.

## Pokušali se probiti

U jučerašnjoj akciji uhapšeni su Gordan Maksimović (1953.), Ljiljan Mitrović (1962.) Radivoje Đorđić (1960.), Slavko Perić (1966.), Mile Vujović (1971.), Vukašin Drašković (1973.), Gojko Stevanović (1967.), Cvjetko Popadić (1952.), Rajo Lazarević (1946.) i Mićo Manojlović (1962.).

Uhapšeni se sumnjiče da su 14. jula 1992. u rejonu sela Lokanj, na području Zvornika, zarobili, a potom ubili 67 Bošnjaka, koji su se pokušali probiti prema slobodnoj teritoriji općine Sapna.

Jedan od onih koji se tog dana našao u koloni koja je krenula prema Sapni bio je i Taib Muminović, da-



**SIPA: Hapšenje po nalogu Tužilaštva BiH**

našnji načelnik općine Teočak.

- Bilo nas je oko 120. Krenuli smo ujutro rano, u nadi da ćemo tokom dana stići do Sapne. Bio sam u prvom dijelu kolone i uspio sam pobjeći u šumu. Znam samo da mnogi koji su tog jutra krenuli sa mnom nisu preživjeli - kazao nam je jučer Muminović.

Prema do sada poznatim

podacima, 53 civila preživjela su zbjeg. Jedni su uspješno pobjegli, a jedni su, nakon zarobljavanja, pušteni da idu dalje, dok je ostalih 67 ubijeno na najsvirepiji način.

## Vezani žičom

- Tijela ubijenih razmijenjena su tokom 1992. i 1993. godine. Kada je urađena obdukcija, tada se

vidjelo kakvu su smrt ovi ljudi imali. Neki od ubijenih imali su rasječen grudni koš i svezan žicom. Kod nekih su bile izvađene kosti, kod nekih udarcima smrskana lobanja, neki su bili strijeljani... Vjerujem da će sudski proces koji slijedi otkriti više detalja o ovom zločinu - kazao nam je Muminović.

**A. HADŽIĆ**